

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst (“Službene novine Zeničko-dobojskog kantona”, broj 7/10), a u vezi sa članom 4., 5. i 9. Zakona o kontroli cijena („Službene novine Federacije Bosne i Hercegovine, broj: 2/95 i 70/08), na prijedlog Ministarstva za privredu, Vlada Zeničko-dobojskog kantona, na 98. sjednici, održanoj dana 19.03.2021. godine, d o n o s i

ODLUKU
o mjerama neposredne kontrole cijena određenih proizvoda od interesa
za Zeničko-dobojski kanton

Član 1.
(Predmet)

(1) Ovom odlukom propisuju se mjere neposredne kontrole cijena proizvoda i usluga koje su od interesa za Zeničko-dobojski kanton (u daljem tekstu: Kanton).

(2) Proizvodi i usluge od interesa za Kanton su:

a) sve vrste brašna od merkantilne pšenice namijenjene za ljudsku ishranu bez obzira na pakovanje,

b) sve vrste hljeba, peciva i drugih pekarskih proizvoda od brašna žitarica,

c) sve vrste mlijeka (pasterizirano, homogenizirano i sterilno).

Član 2.
(Maksimalna veleprodajna i maloprodajna marža)

U cilju sprečavanja većih poremećaja na tržištu i u kretanju cijena proizvoda i usluga od interesa za Kanton, pravna i fizička lica učesnici u proizvodnji i trgovini proizvoda iz člana 1. stav (2) ove odluke, dužni su od dana stupanja na snagu ove odluke, cijene istih formirati na sljedeći način:

R.br.	Vrsta proizvoda	Maksimalna veleprodajna marža	Maksimalna maloprodajna marža
1.	Sve vrste brašna od merkantilne pšenice namijenjene za ljudsku ishranu bez obzira na pakovanje	do 8%	do 10%
2.	Sve vrste hljeba, peciva i drugih pekarskih proizvoda od brašna žitarica	do 8%	do 10%
3.	Sve vrste mlijeka (pasterizirano, homogenizirano i sterilno)	do 8%	do 10%

Član 3.

(Nabavna cijena i zavisni troškovi)

(1) Pod nabavnom cijenom proizvoda u prometu na veliko, odnosno na malo podrazumijeva se neto fakturna cijena proizvođača, odnosno dobavljača uvećana za zavisne troškove.

(2) Pod zavisnim troškovima podrazumjevaju se troškovi utovara i istovara proizvoda, troškovi transporta od stovarišta dobavljača do stovarišta kupca, troškovi osiguranja proizvoda u transportu, transportnih kola, lom i kvar proizvoda, posebni troškovi pakovanja proizvoda u transportu, troškovi transporta od stovarišta kupca do njegovih prodavnica, odnosno prodajnih mjesta i troškovi povrata ambalaže na osnovu zaključenih ugovora.

(3) Kao zavisni troškovi iz stava (2) ovog člana, mogu se zaračunati troškovi koje je imalo i kupcu fakturisalo drugo privredno društvo, pravno ili fizičko lice, odnosno troškovi planirani internim aktom društva (ako te usluge vrši sam kupac) do visine koju bi kupcu fakturisalo drugo privredno društvo, pravno ili fizičko lice.

Član 4.

(Obavijest o cijeni i marži)

(1) Obavezuju se pravna i fizička lica na području Kantona da najkasnije u roku do 15 dana po stupanju na snagu ove odluke, dostave Ministarstvu za privredu obavještenje o sadašnjem nivou cijena i marži proizvoda iz člana 2. ove odluke.

(2) Sva pravna i fizička lica na području Kantona, dužni su u roku od 24 sata po promjeni cijena i marži proizvoda iz člana 2. ove odluke, dostaviti Ministarstvu za privredu Kantona obavijest o promjeni cijena i marži.

Član 5.

(Uputstvo o načinu i sadržaju dostave obavještenje o promjeni i evidenciji cijena i marži)

Ovlašćuje se ministar Ministarstva za privredu da donese uputstvo o načinu i sadržaju dostave obavještenje o promjeni i evidenciji cijena i marži.

Član 6.

(Obaveza obavještanja Skupštine Zeničko-dobojskog kantona)

O mjerama neposredne kontrole cijena proizvoda od interesa za Kanton, koje su propisane ovom odlukom, Vlada Zeničko-dobojskog kantona obavijestit će Skupštinu Zeničko-dobojskog kantona u roku od 15 dana od dana propisivanja mjere.

Član 7.

(Kazne)

Za neprimjenjivanje ove odluke primjenjivat će se kazne utvrđene u članu 14. i članu 17. Zakona o kontroli cijena („Službene novine Federacije Bosne i Hercegovine“, broj: 2/95 i 70/08).

Član 8.

(Nadzor)

Nadzor nad provođenjem ove odluke vrši nadležna Kantonalna uprava za inspeksijske poslove.

Član 9.

(Stavljanje van snage)

Donošenjem ove odluke stavlja se van snage Odluka o mjerama neposredne kontrole cijena („Službene novine Zeničko-dobojskog kantona“, broj: 20/07).

Član 10.
(Stupanje na snagu)

Odluka stupa na snagu danom donošenja i objavit će se u „Službenim novinama Zeničko-dobojskog kantona“.

PREMIJER

po Odluci predsjedavajućeg Skupštine

Mirnes Bašić

Broj: 02-16-3825/21

Datum, 19.03.2021. godine

Zenica

DOSTAVLJENO:

1x Ministarstvo za privredu,

1x Kantonalna uprava za inspeksijske poslove,

1x „Službene novine Zeničko-dobojskog kantona“,

1x a/a.